

1 TIMODHY

Wargahng Umodho Naa Agweed Poale Yihr Timodhy

Rob Ke Nying Warga

Timodhy beehda ngaa maa rihj maa ayiih lum Jeacuu, anahg ngad paan cuohn ne Aacya me thiin. Men anahg nyaar Ujudea maa wahn anahg Ugriihg. Anahg ngad waahdh Poal maa Poal na konye konyo thiow yi tiihy puohny lum Juog. Wargahng mar umodho naa agweed Poale yihr Timodhy rubo kaa nying nyepinye adahg me teeg.

Ngo toohn ngo ke nying puohny giuh toohd keew akuud yaa yiiho. Anaa arob yaa uc-ahbe kejea upiny ni beehda gihn me raaj me dhaano bodho yoade nea luube me be nyoadh now anyoadh yihre kedea nea caame mooge akweehre kedea ukweere ke nyuohm. Wargahng ni thiow nyoadh gihn yug bang kar kaahn akuud yaa yiiho maa nyoadh kwaad yaa nahg jo doong wong maalo yi kiin yaa yiiho maa yaa kony giuh gen.

Gug gen puohny Timodhy ke ka doohnge ne ngad tiihj me beer yihr Jeacuu Kriihjto kedea kar ka manye teehng akuude keew yaa yiiho me thoohdh.

Kaa Acaan Luube

Lum umodho 1:1-2

Rob ke nying akuud yaa yiiho maa yaa kaahn
ngo 1:3-3:16

Rob yihr Timodhy ke nying tiihj gihre 4:1-6:21

Yihr Timodhy

1-2 *† Beehda a Poal e gihn gweehd yihri, yih Timodhy. Yih neehn nyethiin yeya ke bang lum Juog ayihi ke cwihnyi acielo neehn mara. Beehn Juog Wuure kedea Jeacuu Kriihjto Ruohdho cub gene muuny mar gen kedea doohr mar gen yihri, kedea wii gene anyoohne gihi piny. Juog Ngaan Boadh won kedea Jeacuu Kriihjto ngaan gaahno ge naa akwany an yi tihiy tihiy yaa oohr gihi Jeacuu.

Yaa Puohny Toohd Ge Keá Meehg Puohny

3 ‡ Wa kaa aroba ngo yihri, ge a'aaya ne ci Macedoanya, a daahd ubeehdi Epicoj beere kwaad nyoge me puohny gihi toohd ngo dhiili kaa ngweel piny yihr gen beere gihi nu be puohny gene.

4 Robi yihr yaa puohny gihi toohd uwii gene gan rog gen ne pihi ne loab batien loohng acoon me gihr nying gen tooro, kedea ne pihi ne loab tien wad me baahr me guge tooro. Nyoge ge ukeehg yi loab batien kwaad gihi nu, noono ubahnge gihn agwiir Juoge yihro be yoado. Bang gihn gihn agwiire ngo yoado kaa dhe yoohn ayiho lum Juog.

5 Luub roba yihri keehg be kahl gene bang gihn ge luub nyaaro. Nhyaahro ke cwihnyi

* **1:1-2 1:1** Ngad oohr: 2:7Ngad Boadh nyoge: Tii 3:4Gaahno: Klo 1:26-27 † **1:1-2 1:2** Timodhy: 1Kor 4:17Nyethiin yeya: 1Kor 4:15; 1Th 2:11; Tii 1:4 ‡ **1:3 1:3** Epicoj: Tiihy 20:1Puohny gihi toohd: 4:1-10; 6:3-5, 20-21; 2Tim 2:16-18, 23-26; Tii 1:10-16; 3:9-11 **1:4 1:4** 4:7; 6:20; 2Tim 2:16, 23; 4:4; Tii 1:14 **1:5 1:5** 1:14, 19; 2:15; 4:12; Rom 12:9; 13:10; 1Kor 8:1; Gal 6:10; 2Tim 1:3, 13; 3:10; Tii 1:15

acielo me yej be diiw. Kwaad nhyaahro gihn yug won ne yaa ayiih lum Juog me ne cohg.

⁶ Yaa puohny toohd ge akweer ke kwaad nhyaaro gihn. Dhe yoohn maa adiehr arwaahnyo yihr gen unahge peem giih maa now e naa acub gene yi wudh gen.

⁷ Kob gene ge beehda yaa puohny loohng Moaje ukwihj gene ngo kejea giih rub gene ke nying gen ge kwihj gene, kedea luub yihdh gen ge kwihj gene thiow.

Gihn Ayug Loohng Ke Nyinge

⁸ Ngahyo cang kejea loohng Moaje ge beer nea ge ngahy dhaane kaa tiihyo wa ka tiihy loohng kii ngo.

⁹ Beehda gihn me ngahj kejea loohng giih paajo ge kuu ayug kaa nying nyoge me beeye. Ge ayug kaa nying yaa yug giih maan paaje. Kaa nying nyoge me reje me kwihy Juog, maa ayug awuohj rih Juog. Nyoge me be wuor Juog maa yaa nahg nyoge, keehd weehg gen maa meehg gen e ge nahg gene naah.

¹⁰ Loohng paajo ge agweed thiow kaa nying yaa mahj, kedea ke nying cuow me bud ke rog gen; ke nying yaa peej nyoge ne ngeew oogo, kedea ke nying yaa toohd. Ge agweed ke nying kwaad yaa kuohng rog gen ke toohd nyum lug kedea ke nying yaa dhahl lum Juog;

1:6 1:6 1:4; 6:4, 20; Tii 1:10 **1:8 1:8** Rom 7:12, 16 **1:9 1:9-10**
Gal 5:19-21 **1:10 1:10** 4:6; 6:3; 2Tim 1:13; 2:2, 15; 3:14; 4:2-3;
Tii 1:9; 2:1, 7-8

¹¹ lum Juog e naa Ciig Beer ge rubo ke nying Juog e Dhaahre amiihr, kede a Juog e naa acub Ciig Beer yihra ne puohnyo yihr nyoge.

Poal Muohj Koohr Juog Ke Nying Tiihy Acub Yihre

¹² Jeacuu Kriihjto Ruohdho koohre amuoehja naa ameehge Wahy Juog cubo yihra me roma tiihy tiihye ne ngad oohr. Koohre amuoehja naa abahnge yea kuu adiiw ke an ukwanye an ne ngaa me tiihy yihre.

¹³ Coon umodho a anahg ngaa me koag ke maahd yaa ayiiho kede a giih me reje ge anaa aroba rih Jeacuu Kriihjto maa yaa batiene giih ajohr anaa ayuga rog gen. Abea Jeacuu Kriihjto gihn me beer atiihye yihra; lubo awiie piny yihra bang gihn giih nu ge atiihya e gihn maa angahya ke nying Jeacuu Kriihjto tooro.

¹⁴ Gihn me beer atiihy Jeacuu Kriihjte yihra naa apaahnge aduuna ne yiih lum Juog kede a upaahnge ngo keraahyo ke nhyaahro me duohng gihn yoad bang Jeacuu Kriihjto.

¹⁵ Lum rob kejea Jeacuu Kriihjto abeehn ne kony yaa adhemuohme wiuh piny ngo beehda lubo maa adiehr me dhili kaa maa, bang gihn yej be diiw keehde. An ke nguda, an naa akaal wudh yaa adhemuohme cang

¹⁶ Abea Juog adhemuohma awiie piny yihra beere Jeacuu Kriihjto beero gihre e bahnge ngo

1:11 1:11 1Th 2:4 **1:12 1:12-17** 2:7 **1:12 1:12** Gal 1:15-16
1:13 1:13 Tiihy 8:3; 9:1-5; 1Kor 15:9; Gal 1:13 **1:14 1:14** 1:5;
1Kor 15:10 **1:15 1:15** Luk 15:2; 19:10; Rom 5:8 **1:16 1:16** Epi
3:7-9; Klo 1:25

be dhaahr ke nyoge ngo nyoadhe nyoadho naa aboadhe an. A ge adhemuohma akaal wudh adhemuohme giih nyoge cang, a aboadh Jeacuu Kriihjte ne nyoadh ngo yihr nyoge kejea be ngaa me be rom ke boadh kedea uyoade Paar Juog nea lum Jeacuu Kriihjto yiihe yiiho.

¹⁷ Poongo kedea wuoro Juog, ke wong ke wong. E naa Ruohdh be niid ni kedea be thow. E naa Juog Aciehg e ngahy yihdh giih nyepinye cang. E noono.

Lum Aceg Poale Piny Yihr Timodhy

¹⁸ Luub ni ge naa aroba yihri, yih Timodhy waahda. Ge padh luube me nyaahn bang gihn ge naa kwaad luub anaa arob yaa agamloohng Jeacuu Kriihjte ke nyingi ne cahngi. Mag luub nu beer mee bang gihn ge nu ukony yihn yi tihiyi.

¹⁹ Mag lum ayiihi teeg mee kedea tihiy gihn maa adiehr beere yeyi ubeehdo naa athaar ke nyoge. Nyoge mooge ge akweer ke mag luub ni noono e lum Jeacuu Kriihjto naa ayiih gene awii gene.

²⁰ § Himanoj kedea Alekjander ge acuba yi cing atiihb ukeehg ge e ne room ke yaa nu. Ge acuba yi cing atiihb ukeehg ne kihm gen beere lubo me raaj be cahg gene ke robo ke nying Juog!

2

Kwaj Yihr Juog Ke Nying Ruohdh Amag Paajo

1:17 1:17 Rom 16:27 **1:18 1:18** 4:14; 6:12; 1Kor 9:24-25; 2Tim 4:7-8; Juud 3 **1:19 1:19** 1:5 § **1:20 1:20** Yimoanoj: 2Tim 2:17Alekjander: 2Tim 4:14; 1Kor 5:5

¹ Teeda teedo yihri kejea bar maalo ke rob yihr yaa ayiiho umuohj gene koohr Juog kedea ukwahy gene yihr Juog ke nying nyoge beehd,

² kedea thiow ke nying ruohdh paajo maa yaa acub kuohn me doonge. Kwahy gene ke nying yaa nu bang gihn ge ne meehg nyoge caahdho ke yoooh me ne cohg ubahnge ruohdhe wo be kaahn gene ke cing nyooro; kedea ubeehdo ke beehdo me nhyaar Juoge.

³ Kwaj ke nying nyoge ngo beer yi wong Juog bang gihn Juog daahd unghay nyoge athiir ke nyinge beere wahy gen boadhe boadho.

⁴ Juog daahd ngo ubeehn kwaad dhaane cang unghaye Ciig Beer kedea utiihye ke gen beere boadh wahy yoade yoado.

⁵ Juog daahd uboadhe wahy nyoge bang gihn e naa gihn daahd uyuge ngo kedea ngo ngahj thiow kejea dhaano acielo cog e naa awii boadh nyoge yihre. Ngaan ngo beehda Jeacuu Kriihjto ge anyuol wa kwaad dhaano utaahngo.

⁶* Ngahyi thiow kejea ree acube ne naah beere nyoge boadhe boadho cang. Naa acube ree ne thoo e naa kaa angeye kejea Juog daahd uboadhe wahy nyoge cang.

⁷ † E naa gihn akwany Juoge an ne ngad oohr beere Ciig Beer wiihwa wiihwo yihr yaa upiny cang unghay gene ngo naa adiehr. A padh ngaa me rob giih toohd.

2:1 2:1 Epi 6:18-19; Pihp 4:6 **2:3 2:3** Tii 3:4 **2:4 2:4** 2Tim 2:25-26; 2Pii 3:9 **2:5 2:5** 1Kor 8:6; Rom 3:29-30; 10:12-13 * **2:6 2:6** Mak 10:45; 2Kor 5:15; Gal 1:4; Tii 2:14; 1Jon 3:16Awaahn ni: Gal 4:4; Tii 1:3 † **2:7 2:7** Ngad oohr: 1:11-17; Gal 1:1; 2:7-8; Epi 3:7; 2Tim 1:11

⁸ Riown luube me roba yihri e man: Teed ngo yihr yaa kwahyo yihr Juog nyum nyoge ke bang kuohn kwaj cang kejea nyoge me be tiihy giih me reje ge keá kwahyo e aduun gen arahnyo wale e ge uweehr.

Ka Beehd Maahne Kiin Nyoge Kii Ngo

⁹ Dahg luube me roba yihri ne teed yihr yaa ayiiho beehda ke nying maahn. Maahn ge keá ngahbo kedeá rog gen keá ruug gene ke nying nyoadh rog nyum cuow. Kwaad waare me ngien ge teeg wale giih ruug me ngien ge teeg me neehn ge dhaahb ge keá cub gene yi cwihny gen ne giih ngeew.

¹⁰ Abea maahn yaa ayiiho nahge par maa awuob e ne cub gene yi cwihny gen ne nyoadh ngo kejea ge maahn me ngahy lum Juog.

¹¹ Beehn maahne lihng gene giih puohny yihr gen ke leng leng kedeá ke wuoro.

¹² Ngo be yiiha ubeehn dhaage upuohnye nyoge yi wod Juog. Kare tooro ubeehn dhaage utihnge wiie maalo rih dhecuow. Luube ge keá beehre.

¹³ Bang gihn Adam e naa anaa akuong ke caa umodho, ce cag Eaba.

¹⁴ Abea kuu anahg Adam e naa adwaahng, anahg dhaago e naa adwaahng udhahle yi lum Juog.

¹⁵ Abea keehd maano, e dhaago dhiil kaa boadh bang gihn anahg dhaago e naa anyuol Ngad Boadh won. Jeacuu Kriihjto maahn ge

uboadhe; maahn giih ayiiho ke lum Jeacuu Kriihjto ge tiihy giih beeye ge anhyaar Jeacuue.

3

Ngaa Cub Nyum Yaa Ayiiho

¹ Gihn beehda ucaale maa athiir. Beehda gihn me beer nea dhaano daahd udoohnge ne ngaa me duohng nyum yaa ayiiho ke nying tiihy Juog.

² Abea nea yih ukwahnyo ke ngaa me cub nyum nyoge ne tiihy tiihy Juog kea kwanyi ke: ngaa me beer me gihn me raaj be rob ke nyinge. Ngaa me yihre naa dhaago acielo cog. Ngo dhiil nahg ngaa me wiihe kwel. Ngaa me ngahy ree koaro. Ngo dhiil nahg ngaa me nhyaahr paaje. Nahge ngaa me ngahy teed yihdh giih agweed yi kitaab Juog.

³ Nahge ngaa me ngej me padh ngad bad maa ngad kuohng nyoge. Nahge ngaa me wiihe keá cub yi maadh kuong kedea cwihnye keá cub yi nhyaar giih lonyo.

⁴ Ngaa me ngahy yaa paare ke maa beer mee kedea nyethene ge apuohnye ke dhe yoohn beehdo me beer.

⁵ Ngaa me be rom paare ke maa beer mee yaa ayiiho ge be rome ke maa thiow.

⁶ Beehda ngaa aceng yi akuud yaa ayiiho e ne doohng ne ngaa me duohng nyum nyoge. Bang gihn, nea ngo padh ngaa maa aceng, e ngo pahdh yi giih nhyaam noono e Juog cwihnye urahnyo ukihme ngo wa kaa akihme atiihb ukeehg.

⁷ Ngaan duohng nyum yaa ayiiho dhiil nahg

ngaa me ngo ke leeyo, keehd nyoge me padh yaa ayiiho e ngo leej gene leeyo. Ngo dhiil kaa wuoro beere tiihye yihr Juog be rahny ke nying gihn apahdhe yi boon atiihb ukeehg. Atiihb ukeehg ngaa daahd tiihy ngo ke raanyo.

Diihkone

⁸ Yaa kony ngaa duohng nyum yaa ayiiho ge cuohn ne 'diihkone' dhiil gene nahg nyoge me gihn me raaj be rob ke nying gen, nyoge me padh yaa waal. Nahg gene nyoge me wudh ge be cub gene yi maadh kuong kedea nahg gene nyoge me be daahd uyoaad gene giih lonyo ke dhe yoohn acamo.

⁹ Nahg gene nyoge me mag lum Juog naa anyoadhe yihr gen ke cwihny gen acielo me yej be diiw.

¹⁰ Abea umodho e ge poohd kuu akwany, e ge ke muojo ke tiihj me maany kaa tiihy gene kii ngo. Noono e yaa tiihy gen abeehn oogo beer mee ge ke kwanyo ne diihkone arumo.

¹¹ Maahn diihkone nahg gene nyoge me gihn me raaj be rob ke nying gen. Kedea nahg gene maahn me padh yaa waaj. Nahg gene maahn me be nhyaar maadh kuong. Maahn me tiihy gen ne kew.

¹² Diihkon nahge ngaa me yihre ne dhaago acielo cog kedea ngahye yaa paare ke maa beer mee kedea nyethene ge apuohnye ke dhe yoohn beehdo me beer.

¹³ Diihkone giih tiihy gen beer, wuohro ke nying giih beey naa atiihy gene yoad gene yoado

bang Juog, e thiow kare nud urub gene ke nying Jeacuu Kriihjto e lwahr tooro rog gen.

Akuud Yaa Ayiiho Kedeo Meehn Yihdh Looing Juog

¹⁴ Keehd man gweeda warga gihn yihri ni, cwihnya ne beehn bangi ka me cahng.

¹⁵ Abea nea kar beehno piow piow tooro yihra, e kar beehdo gihro wo yaa yiiho ngo agweeda yi warga. Ka ubeehdo kii ngo Paar Juog gih akuud yaa ayiiho e be gug. Akuud ngo e ne nyoadh gihn maa adiehr ke nying Juog.

¹⁶ Beehda adiehr me cwihny be daag, e giinh ngahyo ke nying Jeacuu Kriihjto kedea giinh ne kiino ke en ge beey. Jeacuu Kriihjto abeehno ubeehde wa dhaano now. Wuohde giinh Juog ge anaa buude kaa abeehde wiinh piny. Abea naa anahge Waahd Juog e ngo atiihy athere ke dhe yoohn teeg Wahy Juog. Kedea naa athowe e acahr kedea utihng Juoge ngo maalo batien kaa athum tiihye. Ciig Beer gihre puohnyo puohnyo yihr nyoge cang ke bang wiinh piny kedea ngo amag gene ke cwihny acielo.

4

Yaa Puohny Giinh Toohd

¹ Abea ateed Wahy Juoge yihro kejea yi nihn gug piny yaa ayiiho mooge ge ukweer ke lum Ngad Boadh nyoge udoohng gene ne yaa lihng loohng yaa arub atiihb ukeehge yi wudh gen.

3:15 3:15 Epi 1:23; 2:19-22 **3:16 3:16** Mat 28:18-19; Mak 16:19; Jon 1:14; Tiihy 2:33; Epi 1:20-21; Pihp 2:6-11; Klo 1:6, 23; 2Tim 4:17 **4:1 4:1-11** 1:10 **4:1 4:1** 2Tim 3:1

² Luub ni ge beehn kaa bang yaa toohd ge kang nyoge e wudh gen be laahy, kejea ge beeye.

³ * Ngo uteed gene kejea beehda awuohj unyoohm nyoge kedea beehda awuohj ucam rihngo maa kwaad caame mooge. Caame me Juog ge ngahy gihn maa athiir e naa acub gen yihr yaa ayiiho, ne camo ke mihn cwihny gen kedea e ge muohj koohr Juog.

⁴ Kwaad gihn acag Juoge kare nud ucame ke mihn cwihny nea koohr Juog muohjo muohjo.

⁵ Gihn me raaj tooro rog caame nea Juog peehnyo peehnyo udooje gen yihro bang gihn anahg Juog e naa acub caam ngo yihro.

⁶ Nea giikh teeda yihri ni ge baari ke wong maalo yihr nyoge mooge, e yih unahg ngad puohny me ngahy tiihye ke tiihyo. Ngaa me kuohme ayaahng lum Juoge ne cohg kedea me kaahn dhe yoohn puohny me ne cohg.

⁷ Yih keá piikh ne cub wiichi ne peem giikh toohd kedea ne waaj giikh maa puoge. Ngiiij rihi ke yug giikh me cub teeg yoad ke nying lum Juog yihri.

⁸ Ngiiij rog ke yug giikh me cub tee kuohm ngo beer thiow. Abea tee cub ke nying giikh lum Juog e ne wiiche ne maalo. Nea neehn maano kea ngiiij rihi ke yug giikh cub tee yoad ke nying lum Juog kedea koagi kaa tiihy giikh me yug yihn ne ngad yiiho me ne cohg. Noono arumo e tee gihn ayoadi yih ukonye. Yih ukonye wiich ngoom kan, kedea ukonye yihn thiow yi wong maalo yi

* **4:3 4:3** Nyuohm: 1Kor 7:1Caame: Rom 14:2; Klo 2:21; Judea 13:9Muohj koohr Juog: Rom 14:6; 1Kor 10:30 **4:4 4:4** Tihiy 10:15 **4:6 4:6** 1:10 **4:7 4:7** 1:4 **4:8 4:8** 6:6

kuowo ma uyoaad batien thoo.

⁹⁻¹⁰ Gihn beehda loohng maa athiir me dhiil kaa yiiho. Ngo dhiil nyoge kaa yiiho e diero tooro. Gihn daahda ke teedo e man. Gihn buohjo ke tiihy ke nyinge beehda gihn gaahno Juog Aciehg. Juog Aciehg kar boadh wahy acube yihr nyoge cang kedea yaa ayiiho naa abeehn bange ge aboadhe.

¹¹ Luub ni ge dhiili kaa kwaano beer mee nea yih upuohnyo.

¹² Keehd me nahgi nyedhoohg e rihi keá meehg dhahlo. Abea nahge yihn e ne rom yaa yiihoe rog gen keehde ke kwaad ka rubi kii ngo maa ka kaahni rihi kii ngo kedea ke dhe yoohn nhyaahro gihri maa kaa ayiihi lum Juog kii ngo. Nahgi ngaa me giih nyooro tooro ree. Nahge yihn e ne rom rog keehde.

¹³ Tiihyi, nahge kwaan lum Juog yihr nyoge kedea puohny gen maa ciim cwihny gen. Nahge giih nu ge ne tiihy uwahdhe ka ubeehna.

¹⁴ Wiihi keá wulo ne muuny Wahy Juog gihn anyoadh yaa gamloohngjuoge yihri cahng anaa abeehn jo doonge ucub gene cing gen wiihi ne cub yihn yi tiihy nahgi yea.

¹⁵ Yug tiihj gihn ni, e aduuni acubi yea cang beere nyoge cang gihn beer naa atiihyi niid gene niido.

¹⁶ Cub wiihi piny beer mee ukoari rihi ne cohg kedea cub wiihi rih puohnyi. Bar maalo ke tiihy giih nu beere rihi konyi konyo, kedea beere yaa

lihng lumi ge konyi konyo thiow ke dhe yoohn boadh wahy ge ayoadi.

5

Ka Dhiil Timodhy Rob Yihr Nyoge Kii Ngo

¹ Yih keá ngeeny rih ngaa me duohng nea awuohj ayuge, abea cohg lubo yi wiihe ke leeb me yoohm wa kwaad ka rubi keehd wuru naa anyuol yihn. Nea yih cohg lubo yi wiih rihj keá rubi wa kaa apuohnyi wuud miihu.

² Nea yih cohg lubo yi wiih dhaago me duohng keá rubi yihre wa ka rubi yihr miihu. Nea yih urubo ke maahn thene maa nyetheamaahn, keá rubi wa yih puohny ge nye miihu. Rub yihr gen e wihi be pari kejea ge beehda maahn yihri.

Giih Rob Ke Nying Gule

³⁻⁵ Timodhy, maany gule giih yihr gen tooro dhaano me maany gen beer mee. Gulo me ngaa me kony ngo tooro nahge wun e ne muoj ngo ke giih daahde. Kwaad gulo gihn nu Juog e ne gaahne kedea e ne kwaaye ke kwayo ke nying nyango kedea ke thiehno beere muoj Juog muojo. Abea gule giih yihr gen ne nyethen wale kwaay gen, beehn kwaay gene cub gene giih daahd gene yihr gen. Wa maano e nuu ubeehn nyethene ne coal gihn beer ge anaa atiihy yihr gen kedea rog gen unyoadh gene ne nyoge me yug gihn nhyaar Juoge.

⁶ Abea gulo gihn acub wiihe yi daahd cuow keá muoju ke gihr nyepiny. Gulo me wa gihn nu gihr

nyinge tooro Paar Juog, keehd me niide e ngo ucaahdho, e wahye ge athow.

⁷ Rob giikh ni yihr gule beere giikh me raaj be rob ke nying gen.

⁸ Ngaa maa ayiiho me be kony yaa beehda waahde ke en, adoohnge yaa cahng ke en, e ngaan nu ngo akweer ke lum Juog kedea ngo atiihy giikh me raaj maa ayoohm wiikh mar ngaan kuu ayiiho ne weey weey.

⁹ Nahge ke gulo me rune ge awahdh yi run jiehadahg kedea kuu adog ke nyuomo batien cuore naa anaa umodho, e ne madi kiin gule giikh akuud yaa ayiiho.

¹⁰ Kedea gulo giikh nyinge madi kiin gule giikh akuud yaa ayiiho dhiile nahg gulo me tiihye beer, maa nyethene ge apuohnye beer mee, kedea aley ngahy kaa loro. Ngaa maa acub ree ne kony yaa ayiiho kedea me kony ngaa me giikh me raaj apahdh wiixe. Ngaa me nhyaar tiihy kwaad giikh me beer.

¹¹ Abea gule giikh kuu agwag, ge keá madi kiin gule giikh agwag naa acub wudh gen yi tiihy Juog, bang giikh cahng par gene wudh ge ne nyuohm e tiihy Ngad Boadh nyoge wii gene ke piny.

¹² Noonon e ge kiikh Juoge kiikhmo bang giikh awii gene tiihy Juog piny.

¹³ E thiow ge udoohng ne yaa nyaahbo, kedea waaj nyoge ke bang yiidh miehr e naa tiihy gen kedea areem yiidh nyepinye.

¹⁴ A daahd ubeehn gule giikh thene unghy gene rog ge ke kaahno beere jo mahno giikh me

raaj me rob ke nying gen tooro. Noono e ge ke nyuomo unyuol gene ke nyethen maa umag gene mieh y gen beer.

¹⁵ Adiehr muon, gule mooge ge akweer ke lum Juog neehn mar atiihb ukeehg naa akweere ke lum Juog.

¹⁶ Dhaago maa ayiih lum Juog me yihre ne gule maa waahde keehde, kea nahge en e ne mag gen. Ge keá wii yi cing akuud yaa ayiiho, bang gihn akuud yaa ayiiho nahge gule me waahd gen tooro ge ne mag gene.

Jo Doong Yaa Akuud

¹⁷ Kwaad yaa doong nyum akuud yaa ayiiho ge ngahy nyoge ke maa beer, akoohg gihr gen ufwag, adoohnge yaa puohny lum Juog kiin gen akoohg gen ufwag ne cohg.

¹⁸ Beeh roba yi lum anaa gweed yi kitaab Juog, “Ngaa maa atiihy tiihye keá wij ubeehde ke kahj ree.”

Agweed thiow,

“Muor me dihn beel keá mahn ke cam beel giidhne.”*

¹⁹ Nea dhaano abeehn bangi ne luom ngaa me duohng nyum nyoge abea caahdhe e keede e gihre keá yiihi. Kahle nyoge ariow wale adahg maa aniid gihn raaj e tiihy ngaa duohnge.

²⁰ Kaano arumo e gihn ne keew gen yea maanyi maanyo. Nea ngo ayoadi kejea ngaa duohng gihn me raaj ayuge kea kedh ngo nyum

5:17 5:17 1Th 5:12 **5:18 5:18** Luk 10:7; 1Kor 9:9, 12-14 * **5:18 5:18** Paar yaa Judea muor e ne dihn beel. Lum yea, ngaa me tiihyo dhiil kaa koo. **5:19 5:19** Mat 18:16; 2Kor 13:1 **5:20 5:20** Gal 2:14; Epi 5:11

akuud beere gihn atiihye ke ngeyo kedea ubah-nge kwaad gihn nu be tiihy nyoge mooge.

²¹ Teeda teedo yihri nyum Juog maa nyum Jeacuu Kriihjto Ruohdh kedea nyum wuohnjuog kejea mag luub ateeda yihri, kedea tiihyi keehd gen e giikh waal ge be tiihyi kiin nyoge.

²² Giikh ayal yal ge keá yugi nea cingi cubi ke wiih ngaa me roonyi ne tiihy yihri Juog. Beehdi ne ngaa me giikh nyooro tooro ree kedea kweer ke giikh yaa adhemuohme.

²³ Ke nying atwaany yej gihn koag ke mag yihn, na mahdhi mahdho ke koongo me thiin. Yih keá maadh piikh cog.

²⁴ Awuohje giikh nyoge mooge ge guo kaa ngeyo, e ngaan atiihy awuohj ke ngude poohd kuu amag, abea muu nyoge mooge ge be laar ke ngeyo ne weey weey. Ge ngey ke dhecaahn.

²⁵ Tiihj me beer beehd wa maano tiehd, mooge ge guo kaa ngeyo piow piow. Abea keehd me be neehne ne dahr, e ngo be rom ree kano.

6

Baahng

¹ Yaa ayiiho giikh apahdh yi cing nyoge me padh yaa ayiiho ne baahng dhiil gene yaa nu ke wuoro kedea tiihy gene beer yihri gen, bang utoor ngaa me rubo ke lubo me raaj ke nying Juog kedea ke nying lum Juog naa ayiih gene.

² Keehd yaa ayiiho giikh apahdh yi cing yaa ayiiho ne baahng, yaa nu keá dhahl gene. Ge

keá dhahl gene ke nying gihn nahg gene nyoge maa ayiiho wa gen. Nea kare ne cohg nea baahng apahdh yi cing yaa ayiiho e dhiil gene tiihj keraahyo bang gihn yaa yoad gihn me beer yi tiihy gen noono beehda nyoge maa ayiiho wa mar gen.

Nгаа Puohny Adiehr Kedeа Ngаа Puohny Giіh Toohd

Giіh ni ge ne dhiili ke puohnyo utiihy nyoge ke gen.

³ Kwaad ngaan be puohny giіh ateed Jeacuu Kriihjto Ruohdh ge rob lum Juog ukweere ke yiіh giіh ni unahge ke giіh mooge me ne keede ge ne puohnye,

⁴ e ngaan nu adoohng ne ngad nhyaam kedeа giіh me ngahye tooro.

⁵ Ngo uroomo wa ngаа mаа aduune athrow bang giіh ngo kwaan batien giіh me kahl giіh weehr mаа giіh daag cwihny kedeа tiel kiin nyoge kedeа rob ne yahng rog nyoge. Kwaad ngaan nu kahl giіh peehm kiin nyoge me wudh gen tooro kedeа wudh gen arahnyo mаа adiehr be cahge ke ngeyo. Nyoge mаа acub ngo yi cwihny gen kejeа yiіh lum Juog kahl lonyo.

⁶ Yiіh lum Juog utoor giіh moogo me daahd dhaane e naа lonyo.

⁷ Naа anyuol dhaano e giіh lonyo mаа akahle ke en ngo tooro e giіh me aay ke en ngo tooro.

6:3 6:3-10 1:3-7 **6:3 6:3** 1:10; Gal 1:6-9 **6:4 6:4** 1:4; 6:20; 2Tim 2:14 **6:5 6:5** Jon 10:12; Tiihy 20:33-34; 1Th 2:5; Tii 1:11; 1Pii 2:14; 5:2 **6:6 6:6** 4:8; Pihp 4:11; Judea 13:5

⁸ Nea cam nud yihro kedea waare, e gihn keehdo e ne dogo ke daahdo?

⁹ Abea kwaad yaa daahd giih lonyo ge pahdh yi cing atiihb ukeehg bang gihn wudh ge tooro kedea cwihny ge ayuohd ne daahd giih me reje. Giih nu ge ne yug gene ne nyoge me reje ubahnge Paar Juog be yoad gene.

¹⁰ Giih me reje tien gen aay ke bang nhyaar ngiihny, nhyaar ngiihny e ne weehg nyoge mooge wii lum Juog kedea uyoad gene giih raahm cwihny.

Tiihy Timodhy Neehn Kaa Anaa Apuohnye

¹¹ Abea yih Timodhy naa acubi cwihnyi ne yug lum Juog wihi keá cub yihdh kwaad giih nu, cub wihi piny ne tiihy gihn daahd Juoge kedea beehdi ke beehd ngaa maa ayiih lum Juog. Beehdi e yih nhyaar yaa ayiiho wa yihn kedea lum Juog keá wii. Guum giih raahm kedea tiihy gihn me beer yihr nyoge.

¹² Kaal wudh nyoge ke tiihyi ne nyoadh kaa ayiihi lum Juog kii ngo beere yih caa Paar Juog. Anahg Paar Juog e ne cuohn Juoge yihn ne ci yea cahng anaa ayiihi lume nyum nyoge.

¹³ Lihng gihn teeda yihri nyum Juog naa acag nyepinye cang, kedea nyum Jeacuu. Jeacuu ngaa kuu anaa atud ke rob tiihye nyum ruohdh cuohn ne Poantuj Pilaato.

¹⁴ Lihng luub nu kedea mag gen beer mee utoor awuohje me yoad Jeacuu Kriihjte rihi cahng ubeehne ne kihm nyoge.

15 Unahg Juog ge beehda Ruohdh Duohng e keede ge dooje gihn me kaal wiihe tooro, e nu unyoadh cahng umeehge Jeacuu Kriihjto Ruohdho beehno.

16 Juog keede, e be thow, e beed ka me ryaal wong me ngaa me rom ci kaa ngo tooro; ngo be neehn yihr ngaa maa now kedea ngo be ukuonge ke niido. Wuoro ngo bang gihn ruohdhe be gug. E noono.

Yaa Akuud Ge Alony

17 Teed ngo yihr yaa ayiiho naa alony ke giikh ungoom kan, kejea ge keá nhyaam kedea kwaad giikh lonyo me be gaahn ge keá gaahn gene abea gaahn gene Juog ngaa muoj won kaa amahr giikh me thoohdh me meehg cwihnyo ngeedho.

18 Teed ngo yihr gen kejea tiihy gene gihn beer yihr nyoge beere ge ulonyo nyum Juog. Nhyaar gene kony nyoge kedea nywaag gene gihn ne yihr gen ke nyoge.

19 Wa gihn nu, e giikh beeye naa atiihy gene ge neehn giikh lonyo maa akan gene yi Dhaahr Juog. Kaano e kuowo maa adiehr uyo ad gene ka me neehn kuowo mar Dhaahr Juog cahng moogo.

20 Yih Timodhy, cub wiihi piny ne cohg ne mag giikh acub Juoge yi cingi. Yi keá, piikh ne rob ke nyoge me rob giikh me maahn ke robo. Yaa peem toohd kejea ge nyoge maa apuohny.

6:15 6:15 Tiihy 1:7; 2Pii 3:3-9; Any 17:14 6:16 6:16 Jon 1:18; Klo 1:15; 1Jon 4:12 6:17 6:17 Luk 12:15, 20; Jeam 5:1 6:19 6:19 Mat 6:20 6:20 6:20 1:4; 6:4; 2Tim 1:14

²¹ Yaa koohbo kejea ge nyoge maa apuohny
beehde dhe yoohn lum Juog arwaahnyo yihr gen.
Beehn Juoge dooje wun cang.

Luwo

Luwo: Anweehd Me Nyaahn New Testament

copyright © 2003 Wycliffe Bible Translators, Inc.

Language: Luwo

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source
files dated 10 May 2025

ba8353b1-57d5-55f2-870a-7ae8e7acbe62